

大清宣宗成皇帝實錄

大清宣宗效天符運立中體正至文聖武智勇
仁慈儉勤孝敏成皇帝實錄卷之四百四十六

監修總裁官經筵日講起居注官太子太保體仁閣大學士文淵閣領閣事管理戶部事務上書房總辦翰林院掌院學士兼管順

天府府尹事務禮部加五級紀錄十八次大臣實績總裁官經筵講官吏部尚書鑲藍旗漢軍都統管理新營房城內官房大臣稽察內

七倉大臣稽察會同四譯館事務加一級隨帶加六級軍功加三級紀錄五次臣花沙納經筵講官文淵閣提舉閣事兵部尚書總管

內務府大臣鑲白旗滿洲都統稽察內七倉大臣管理宗人府銀庫五翼勅官學憲壽寧閣明園等處稽察御茶膳房御藥房太

醫院造辦處事務隨帶加十八級臣阿靈阿副總裁官經筵講官兵部尚書隨帶加六級紀錄二十次臣周祖培等奉

敕修

道光二十七年丁未八月壬戌月食○秋分

夕
月於西郊。命禮親王全齡。恭代行禮。○

上詣綺春園問

皇太后安。○癸亥。以戶部右侍郎花沙納兼京

營左翼總兵。○以江西按察使溫予巽為直

隸布政使。長蘆鹽運使陸元娘為江西按察

使。○浙江按察使周祖植因病解任。調直隸

按察使周開麒為浙江按察使。以直隸清河

道龔裕為按察使。○馬蘭鎮總兵官慶錫因

病解任。以禮部右侍郎倭什訥為馬蘭鎮總兵官。兼總管內務府大臣。○甲子。諭內閣。布彥泰馳奏。喀什噶爾回匪滋事。現在撥餉調兵籌勦一摺。據稱喀什噶爾卡外。安集延布魯特。糾約本地回子。屯聚城外。尋釁肆擾。該督現已咨會提督。先行帶兵出關。一面督兵親赴肅州。照料調度。並豫調官兵籌畫等語。安集延等回眾。性類犬羊。反覆靡定。膽敢煽結近城回眾。困擾城垣。藐法已極。必應速伸

天討。以靖逆萌。而安邊徼。布彥泰著授為定
西將軍。軍務一切悉聽節制。奕山著作為參
贊大臣。襄辦軍務。均著頒給關防。其所需軍
餉。即著由陝西甘肅兩省藩庫分貯項下動
用支發。該將軍等務宜激勵將弁。除暴安良。
一切相機勦辦。迅速蒞事。俾根株盡絕。邊圉
肅清。以副朕望。○又諭鄂順安奏查辦賑務
大概情形一摺。本年豫省雨澤愆期。被旱甚
廣。疊經諭令該撫將賑撫事宜。悉心籌議。惟

辦災首在得人。該撫所派各員。務當飭令細心經理。俾災黎均霑實惠。所有散放錢米。即嚴飭現委各員。會同各該地方官。周歷履勘。分別戶口多寡。隨處出示曉諭。俾眾目共睹。以杜隱欺。儻有富戶殷商。捐資煮賑。實在好義者。在該殷戶等原係力敦鄉誼。克成善舉。著該撫於事竣後。酌量請獎。至窮黎願往成熟地方。相依親友。亦難強阻。但必須飭沿途地方官。妥為照料。諭令本籍現在放賑。及早

歸來。不得强行驅逐。致滋流弊。以示朕撫綏
安定至意。○又諭。瑞元等奏。卡倫侍衛被控
受賄。請解交庫倫審辦一摺。此案昌吉斯臺
侍衛金齊賢。於俄囉斯所屬之特凌格特地
界。不應干預之事。輒任意給予該處照票。致
該處賊犯。借端搶奪。情節已屬可疑。並據供
有受賄情事。虛實均應研究。著庫倫辦事大
臣。行知俄囉斯。將此案搶馬賊犯哈斯泰等
解至交界地方。會同審訊。三等侍衛金齊賢。

通事卓蓋們都爾。並事主珠布奏。及應訊人
證。一併解往質審。○諭軍機大臣等。本日據
布彥泰馳奏。喀什噶爾被回匪圍城。事甚緊
急。一摺。覽奏均悉。安集延等回眾。膽敢煽結
近城回匪。圍困喀什噶爾城垣。情形甚急。已
明降諭旨。飭令楊以增。暫署督篆。文慶前往
接署。將該督授為定西將軍。奕山作為參贊
大臣。頒給關防。帶兵前往勦辦矣。該督現已
咨會提督。帶兵出關。一面親赴肅州調度。並

豫調官兵。籌辦糧餉。自可一鼓殲擒。惟吉明所調阿克蘇兵三百名。烏什兵三百名。各守地方。均關緊要。再土爾扈特地方。距該城較遠。所調之兵。能否得力。會勦。均著該將軍酌度情形。或即行調動。或另行更換。儻賊勢甚熾。如再須添調陝西甘肅官兵。著一面調取。一面奏聞。至後路糧臺。最關緊要。陝甘兩省庫貯。尚足敷衍。現在先派臬司嚴良訓。道員明誼。馳往辦理。該將軍等亦當剴諭辦理之。

員。覈實搏節。無得藉端虛糜。至附近各處。應有豫為準備者。即著隨時飛咨。有備無患。務使官兵奮勇進勦。俾小醜速就殄滅。毋致滋蔓。是為至要。將此由六百里諭知布彥泰。奕山。並諭令楊以增知之。○又諭。有人奏。江南漕賦不均。請旨飭查一摺。江蘇上年辦理均漕。裁去長價短價名目。原期湔除積習。以昭平允。茲據奏稱常熟。昭文。南匯。三縣。大戶一律增加。小戶則仍如舊。南匯尤甚等語。著李

星沅。陸建瀛。密為訪察。是否實有其事。嚴行查辦。並飭有漕各州縣。悉心經理。務使紳民一體輸納。毋得畸輕畸重。以歸畫一。原摺著鈔給閱看。將此諭令知之。尋奏。查常昭等三縣。並無各糧戶控案。惟南匯縣有已革舉人嚴宗熙。編造歌謠一案。現已提證研訊。並一面諄飭有漕各州縣。悉心經理。均必實均。減必實減。勿竭小民之膏脂。亦勿避大戶之嫌怨。庶於國計民生。兩有裨益。報聞。○河南巡

撫鄂順安奏。省城現得透雨。得旨。稍蘇我中
州萬姓。實深寅感。各屬有續報者。到時據實
奏來。○以兵部尚書文慶署陝甘總督。未到
任前。以陝西巡撫楊以增署理。以布政使恆
春署巡撫。○以戶部左侍郎柏後兼鑲紅旗
護軍統領。○調正白旗蒙古副都統華山泰
為鑲白旗滿洲副都統。以頭等侍衛長清為
正白旗蒙古副都統。○以烏里雅蘇台參贊
大臣麟魁為禮部右侍郎。○命御前侍衛鑲

藍旗護軍統領珠勒亨。二等侍衛德冲額。馳往軍營。隨同定西將軍布彥泰督兵勦辦。○命陝西按察使嚴良訓。甘肅鎮迪道明誼。辦理糧臺事務。○乙丑。諭軍機大臣等。喀什噶爾回匪滋事。昨已明降諭旨。授布彥泰為定西將軍。奕山為參贊大臣。並指示機宜。所有關防二顆。本日由六百里頒發。該將軍等即行祇領。迅速帶兵前往勦辦。無誤事機。惟吉明所調阿克蘇兵三百名。烏什兵三百名。土

爾扈特兵一千五百名。皆距該城較遠。各守
地方。均關緊要。且各該城防兵。本屬無多。分
兵往援。是否能期得力。該將軍等務須體察
情形。或照數調撥。或另行更調。斟酌盡善。務
使官兵布置得宜。以一當百。其應如何調遣
之處。著一面舉行。一面具奏。毋稍拘泥遲延。
是為至要。將此由六百里諭令知之。○又諭。
本日據吉明等奏。回匪圍困喀什噶爾城垣。
現由伊犁等處。咨調官兵。速往應援等語。覽

奏均悉。回匪肆擾。膽敢圍困城垣。該大臣等現已由伊犁等處調兵救援。賊匪詭譎多端。儻有隙可乘。自當不失機會。分路兜剿。但不可中其奸計。若賊匪猖獗。眾寡不敵。該大臣等務須持以鎮靜。以待大兵。切不可輕舉妄動。至吉明所調土爾扈特兵一千五百名。阿克蘇烏什兵各三百名。是否能期得力。已飭布彥泰等察看情形。酌量分別辦理矣。將此由六百里諭令知之。○又諭。本日據開明阿

等奏。七里河兵敗。退回城內。已飛咨伊犁調兵救援。並請飭派大兵進剿等語。回匪肆擾。該將軍參贊等接奉諭旨。自必迅速進剿。立殄么膺。吉明等為中權扼要。亦必首尾接應。該大臣等。惟當激勵兵民。竭力固守。不可輕舉妄動。俟救援一到。聲勢震懾。或可立解重圍。至該大臣等。自請先行交部嚴議治罪之處。著俟事竣後。再降諭旨。將此由六百里諭令知之。○以禮部尚書保昌兼署兵部尚書。

工部左侍郎阿靈阿。署管理戶部三庫事。戶部左侍郎柏後。署教習庶吉士。○以吏部尚書恩桂。管上駟院事。吏部右侍郎福濟。管武英殿事。○以御前頭等侍衛希凌阿。署武備院卿。○以鑲黃旗蒙古副都統德順。署鑲藍旗護軍統領。○以鑲黃旗漢軍都統春山。兼署鑲藍旗漢軍都統。○賞前任馬蘭鎮總兵官善燾。副都統銜。為烏里雅蘇台參贊大臣。○以葉爾羌幫辦大臣吉明。署參贊大臣。阿